

**Meeqqanik kinguaassiutitigut atonerluisartut pillaatisinikunut
nakorsartinnikkut kinguaassiutitigut atuinissamut
piumassusaarutsitaanissamik (medicinsk kastration) aammalu meeqqat
kinguaassiutitigut atonerlugaasimasutut sullinneqartunut tarnikkut
ikiorserneqarnermut aningaasartuutit tamakkiisumik
akiliisinneqartalernissaanik pisussaaitaasalernissaanik
pillaatisisalernissaat pillugit oqallisissiatut siunnersuut**
(Inatsisartunut ilaasortaq Nivi Olsen, Demokraatit)

Akissuteqaat

(Aatsitassanut Inatsisillu Atuutsinneqarnerannut Naalakkersuisoq)

Oqallisissiatut siunnersuummut matumunnga Inatsisartunut ilaasortap Nivi Olsenip, Demokraatineersup, aallarniineranut qujanaq.

Kinguaassiutitigut atonerluisarnerit unitsinneqartariaqarnerat unitsinneqarnissaallu pillugit Naalakkersuisut siunnersuuteqartoq isumaqatigaat. Ukiuni kingullerni sammisaq pillugu ukkatarinninneq qujanartumik annertoorejussuuvoq, akiorneqarneranullu alloriarnerit arlallit tiguneqareersimapput, kisianni aqut sulit takivoq. Naalakkersuisut isumaat malillugit atonerluinerit pinnginnissaat pingaaruteqarluinnarpoq. Taamaammat inunnut atonerluisimasunut, inunnullu atonerluinissamik isumaliutiginnittunut katsorsaanermik neqerooruteqarnissap ukkatarineqarnissaa pingaaruteqarpoq. Periarfissaq tamanna Naalakkersuisut Klinik Killiliisamik pilersitsineratigut tunniunneqarpoq, taanna nuna tamakkerlugu kannguttaatsuliortartut katsorsarneqarnissamik neqeroorutaavoq ukioq manna aprilimi ammarpoq.

Kannguttaatsuliortartut eqqartuunneqarsimasut nakorsaatit atorlugit kinguaassiutitigut atuinissamut piumassusaarutitaanissaasa oqallisigineqarnissaa siunnersuuteqartup kissaatigaa. Atoqatigiinnermi pissutsit pillugit katsorsaanertut ukiorpassuarni atorneqartarsimasoq, kinguaassiutitigut atuisarnerup annikillisinneqarnissaanut nakorsaatit atorlugit katsorsarneqarneq, uani pineqarpoq. Periarfissaq Kalaallit Nunaanni aamma atuuppoq, kisianni Kalaallit Nunaanni peqqinnissaqarfimmi nalinginnaasumik katsorsaatit atorneqarneq ajorpoq.

Inuup eqqartuunneqarsimasup kinguaassiutitigut atuerusunnerata annikillisinneqarnissaa pillugu katsorsarneqarnissaanut piumasaqaateqarsinnaaneq pinerluttulerinnermi inatsimmi malittarisassanik periarfissaqareerpoq. Imaappoq, inuk nakkutigineqartussanngorlugu eqqartuunneqarsinnaavoq. Eqqartuussummi tassani, eqqartuunneqartup eqqortitassanik, piumasaqaatinik arlalinnik piumasaqartoqarsinnaavoq. Eqqartuussiviup piumasaqaatit aalajangiiffigisinnaasaa tassaavoq, eqqartuunneqartoq atoqatigiinnermut tunngasutigut katsorsarneqassasoq, matumani nakorsaatit atorlugit kinguaassiutitigut atuinissamut piumassusaarutitaanissamut nakorsaatit ilanngullugit. Taamatuttaaq inuup inissiisarfimmiittussanngorlugu eqqartuunneqarsimasup, imaluunniit inuup tigummigallagaanissamik eqqartuunneqarsimasup misiligummik iperagaanissaanut atatillugu atoqatigiinnermut tunngasutigut katsorsarneqarnissaata piumasaqaatigineqarnissaa periarfissaavoq. Pinerluttuliorsimasup kinguaassiutitigut atuerusunnerata

annikillisinneqarnissaa pillugu nakorsaait atorlugit katsorsarneqarnissaanut inatsisitigut killissarititaasut inissinneqareerput.

Allatut oqaatigalugu, periarfissaq tamanna tassaneereerpoq.

Inuk taamatut katsorsarneqarneqarnissamik neqeroorfigineqarsinnaanersoq pillugu apeqqut peqqinnissaqarfimmit nalilerneqartariaqarpoq. Taamaammatt pineqartoq pillugu peqqissaarussamik qulaajaasoqassaaq innersuussisoqarlunilu, tassami nakorsat suliaat ilisimasalittullu piginnaasaat pillugit naliliineq aallaavigalugu katsorsaaneq sunniussinnaassuseqartariaqarpoq, tassami katsorsaaneq napparsimasumut peqqissutsikkut navianartorsiortitsisinnaavoq aamma peqqinnissaqarfimmut isumalluutiniq atuiffiussalluni.

Ilaatigut katsorsarneqarnermi nakorsaait saniatigut sunniutaat ilungersunarsinnaasut misissuiffigineqartussaanagerat pissutigalugit, aamma nakorsaait pineqartut saniatigut, napparsimasup peqqissusaa pillugu misissuinermik malitseqartitsisoqartariaqartariaqarnera pissutigalugu, nakorsaait atorlugit kinguaassiutitigut atuinissamut piumasusaarutititsinissamut katsorsaaneq isumalluutiniq annertuunik atuinermik piunasaqarfiunissaa peqqinnissaqarfimmi oqartussaasut nalilerpaat. Taassuma saniatigut sunniuteqarluartumik katsorsarneqarnermik ingerlatsinerup ataatsimoortup ilaatut, ilaatigut tarnip nappaataanik tarnikkullu katsorsarneqarnermik malitseqartitsisoqartussaassaaq. Aningaasartuut annertoq taanna Kalaallit Nunaanni peqqinnissaqarfimmit akilerneqartussaassaaq. Katsorsaaniissaaq pillugu misissuueqqissaarneq katsorsarneqareermermilu malitseqartitsineq massakkut maani Kalaallit Nunaanni isumalluutit sulianut teknikkikkullu tunngasut peqqinnissaqarfiup aalajangiiffigisinnaasai atorlugit, nunat tamat akornanni katsorsaasarnermi pitsaassutsinut naleqqiullugit pisinnaangimmat, tassunga atatillugu oqaatigineqassaaq.

Meeqqanut atonerlunneqarsimasunut psykologimik oqaloqateqarneq aqputigalugu imaluunniit psykologimit allatut katsorsarneqarneq aqputigalugu sulianik ilisimasalinnit ikiorneqarnermut aningaasartuutit kannguttaatsuliortunit akilerneqartarnissaannut periarfissat oqallisigineqarnissaat siunnersuuteqartup taamatuttaaq kissaatigaa.

Soorlu siunnersuuteqartup taareeraa, Kalaallit Nunaanni eqqugaasunut taarsiissuteqartitsisarneq pillugu malittarisassat ullumikkut nassaassaareerput. Malittarisassat atuuttut malillugit, pinerluttuliornerup malitsigisaanik aningaasartuutit uppenarsarneqartut taarsiissutigineqarnissaat pillugit eqqugaasumut eqqartuussinermi taartisiaqartitsisoqarsinnaavoq. Eqqugaasumut psykologimit ikiorneqarnermut aningaasartuutaasimasut taakkununga aamma ilaapput. Tamanna eqqugaasoq qanorluunniit ukioqaralarpat atuuppoq.

Tamanna suliap ingerlanerani piunasaqaataatillugu, pinerluttulerinermi suliap ingerlanerani eqqartuussiviup taarsiissuteqartitsinissaaq pillugu apeqqut suliarisarpa. Pinerluttulerinermi suliap ingerlanerani eqqartuussiviup tarsiissuteqarnissaaq isummerfigisinnaangippagu, pinerlunnernit eqqorneqartunut naalagaaffimmit taarsiissutit pillugit inatsit malillugu Kalaallit Nunaanni Pinerluffigineqarsimasut taartisinissaannik Aalajangiisartut aalajangiisnaapput, taannalu peqqussutikkut nr. 472-ikkut 25. september 1984-imeersukkut Kalaallit Nunaannut atuutilersinneqarpoq taannalu kingullermik peqqussutikkut nr. 2461-ikkut 14. december 2021-imeersukkut (eqqugaasut taarsiiffigineqartarnerat pillugu inatsisikkut) allanngortinneqarpoq.

Psykologimit katsorsarneqarnermut aningaasartuutit pillugit taarsiivigitinnissaaq sulisaatsit aalajangersimasut malillugit Pinerluffigineqarsimasut taartisinissaannik Aalajangiisartut qinnuteqarfigineqarsinnaavoq. Ilaatigut aningaasartuutit uppenarsarneqarsimanissaat tassani piunasaqaataavoq.

Taamaalilluni eqqugaasup periarfissai pillugit aalajangersagaqareerpoq, kisianni taakku naammattumik atorneqartarnersut pillugit siunnersuuteqartup oqallittoqarnissaa aallarnerpaa.

Eqqugaasut pillugit suliniutit akuersissutigineqarnerisigut, tassani eqqugaasut illersorneqarnissaat pillugu eqqartuussisarnermik inatsimmi aalajangersakkat arlallit eqqunneqassallutik, eqqugaasut pisinnaatitaaffimminnik pitsaaneruseqarnissamik ilisimasaqalernissaasa periarfissinneqarnissaat Naalakkersuisut neriutigaat. Paasissutissiisarneq siumut aqqutissaavoq, aamma aalajangersakkat nutaat, Folketingimi ulloq 5. maj akuersissutigineqartut, ukiullu nikinnerani atuutilersussat aqqutigalugit, eqqunngitsuliorfigineqartup inatsisitigut inissisimaffia pillugu ilitsersuunneqarnissaanik politiit unnerluussisussaataasullu pisussaaffilerneqarnerat ilanngunneqarpoq. Tassunga atatillugu eqqugaasup suliap ingerlanerani innuttaasutut eqqartuussisunut tunniussisinnaanera aamma Pinerluffigineqarsimasut taartisinissaannik Aalajangiisartunut taarsiivigineqarnissamik qinnuteqarsinnaanera pillugit ilitsersorneqarnissaa immikkut taaneqarput.

Taamatut oqaaseqarlutik oqallittoqarluarnissaa Naalakkersuisut kissaatigaat.